

Dis Koninkrykstyl!

deur: Ds. Marius Breytenbach



Van na Pinkster tot aan die begin van die Adventtyd (in aanloop tot Kersfees) breek 'n tyd in die kerkjaar aan wat ons koninkrykstyl noem. Hierdie begrip het die kern van Jesus se prediking gevorm. Die oorgrote deel van die bevolking in Jesus se tyd se begrip van 'n koninkryk was waarskynlik nie baie positief nie, omdat dit onder andere na die magsbehepte Romeinse keisers wat die landsburgers se lewens beheer het, verwys het.

Wanneer Jesus dan oor God se koninkryk gepraat het, het dit as praktiese verwysing gedien van hoe anders God se heerskappy lyk teenoor dit wat hulle in hulle eie teenswoordige wêreld beleef het. Jesus se prediking het die vroeë gelowiges geïnspireer om te midde van onreg, onsekerheid en die vrees wat daarmee saamgaan, doelgerig in hulle hede te leef in plaas daarvan om opstandig te raak. God regeer oor die magte en realiteite van hierdie wêreld – 'n wêreld waarin gewone mense met geen mag nie, tog ook betekenisvol kan meeleeft. [Lees meer . . .](#)

'n Pad met geestesgesondheid

Deur: Dr. Stephan le Roux

Elke mens se gesondheid is sekerlik sy of haar kosbaarste besitting. Hoe ouer 'n mens word, hoe meer raak jy bewus van hierdie waarheid en hoe sterker word jou ingesteldheid om dit te koester. Mag ons ons gesondheid nooit as vanselfsprekend aanvaar nie. Dit wat ek en jy nou het, kan môre totaal en soms ontstellend anders lyk.



Ek wil met hierdie artikel die soeklig spesifiek op geestesgesondheid as een dimensie van gesondheid laat val. Die doel hiermee is om begrip, deernis en sensitiwiteit vir geestesgesondheid te kweek en die stigma wat daaraan kleef, af te breek. Hopelik ontlok dit ook debat, want die neiging bestaan om hierdie onderwerp óf te vermy, óf op 'n negatiewe wyse te hanteer. Ek wil ook die begeerte uitspreek dat hierdie skrywe aan mense wat uitdagings in dié verband ervaar, hetsy persoonlik of in hul eie familie- of vriendekring, hoop sal gee. Ek

skryf na aanleiding van jare se werk in hierdie veld en veral uit my persoonlike ervaring in my eie familiekring. [Lees meer . . .](#)



Hervatting van eredienste

Tydens vlak 3 van die inperkingsmaatreëls word kerke toegelaat om in 'n beperkte formaat en onder spesifieke voorwaardes weer eredienste aan te bied. Ons beoog om vanaf Sondag 5 Julie 2020 met twee dienste – om 09:00 en 11:00 – te begin. Dienste mag nie deur meer as 50 persone, insluitend die leraar, eredienswerkers en musikante bygewoon word nie. Let wel dat ons steeds voortgaan met die weeklikse aanlyn dienste op die webwerf.

Neem asseblief van die volgende praktiese reëlings kennis:

- Die meditatiewe diens en die jeugdiens (Relevant) sal steeds as opnames op Sondagoggende vanaf 06:00 op die webwerf beskikbaar wees. [Lees meer . . .](#)
-

Edelweis-bediening raak elektronies, eensydig en eensaam!

Deur: Dr. Theo Swart

Die bediening by Edelweiss het in die verlede weeklikse Bybelstudie, persoonlike besoeke op Donderdae, 'n bykomende Bybelstudie-geleentheid elke Donderdag vir twee groepe van ongeveer 50 mense elk en preke so twee keer per maand, behels. Verjaarsdae is ook altyd met die oorhandiging van 'n kaartjie en persoonlike gelukwense gevier.

Met die uitbreek van die Covid-19-pandemie moes eers Edelweiss se versorgingseenheid en toe die hele dienssentrum, vanaf 19 Maart drasties ingeperk word. Inwoners kon glad nie die sentrum verlaat nie en net personeel kon onder streng kontrole binnegaan. Met die gevolg, my bediening aan die groep Edelweissers het skielik heeltemal verander. [Lees meer . . .](#)



Feesmark – dalk nog nie totsiens nie?

Feesmark 2020 sou na agt jaar Marelize Verreyne se laaste feesmark om te reël, gewees het. Sy het aftreeouderdom bereik en die modieuse ouma van vier kleinkinders, met die vyfde enetjie DV op pad in Augustus, het besluit dit raak tyd om meer aandag aan haarself, haar man en geliefde kinders en kleinkinders te gee.

“En toe kom die koronavirus alles deurmekaarkrap,” sê Marilize. “Ek is nog baie onseker of ek volgende jaar se mark sal aanpak. Sonder om dweperig te klink, het ek besluit om regtig te bid daarvoor. Ek glo die Here sal my soos talle ander kere in my lewe van leiding voorsien.


[Lees meer . . .](#)

Op die foto is Marilize saam met haar twee dogters, seun en vier kleinkinders.

Die grootsaal bied skulping teen die Kaapse storm

“Toe die stormweer ons verlede week tussen 10 en 12 Junie tref, het Stellenberg se kerkraad die moedige stap geneem om hul grootsaal as ’n tydelike nagskulping vir 27 hawelose mense oop te stel,” sê dr. Braam Hanekom, verbonde aan die Sentrum vir Publieke Getuienis, sinodale kantoor, Wes-Kaap “en is ons opreg dankbaar teenoor die gemeente vir dié wonderlike gesindheid.”

Die tydelike skulping is in samewerking met MES in Bellville gereël en koördinerend met die organisasie het deurlopend plaasgevind. Uiteraard moet MES aan alle Covid-19-regulasies voldoen en sosiale distansiëring moet dus in alle skulgings toegepas word. Daarom moes slaapplek tot slegs 27 persone vir die beskikbare ruimte beperk word. [Lees meer . . .](#)




#Connected Church

#Connected church

Deur: Dirk Brand

Die jaar 2020 sal in geskiedenisboeke beskryf word as die jaar waarin die Covid-19-virus die wêreld verander het – 'n onsigbare vyand wat die wêreld tot stilstand gedwing het. Mense is in hulle huise ingeperk en alle openbare byeenkomste van groepe mense is verbied ten einde die verspreiding van die virus te bekamp. Dit het natuurlik kerke ook ingesluit. Geslote kerke as gevolg van 'n virus was seker vir almal voor die uitbreking van hierdie pandemie ondenkbaar en toe word dit 'n realiteit.

Alhoewel mense skielik nie meer vrylik kon rondbeweeg en reis nie, het die inperking tog mense nader aan mekaar gebring. Solidariteit met mense in nood wat deur dieselfde onsigbare vyand bedreig word, asook die spontane steun in verskillende gemeenskappe vir veral die gesondheidswerkers wat aan die voorpunt van die stryd teen die virus staan, het wyd oor grense heen weerklank gevind. Kerkgeboue wat gesluit is, beteken egter nie dat kerke skielik ophou bestaan het nie. Inteendeel, kerke het nuwe maniere gevind om te funksioneer en juis in die onseker tye 'n bron van hoop vir gemeenskappe geraak. Kerke bestaan immers nie uit geboue nie, maar uit mense. [Lees meer . . .](#)



'n Buitelug-hemelvaartdiens in Fürstenfeldbruck, Duitsland.

Besoek die #connectedchurch-blog

Projek Samaritaan – sop beveg



honger

Deur: Ds. Why Duvenhage

Ons het reeds op verskeie platforms breedvoerig met lidmate gekommunikeer rakende Projek Samaritaan, wat op die kerkraad se inisiatief van stapel gestuur is. Die projek wil nood van watter aard ook al, insluitend nood gekoppel aan die Covid-19-pandemie, op verskeie maniere, soos deur middel van die entrepreneursprojek en die familienetwerk, aanpak. Volledige inligting oor hierdie aksies is op ons webwerf beskikbaar.

Die grootste komponent van Projek Samaritaan bly steeds voedselhulp. Ek is baie dankbaar vir die sterk span helpers wat by die kosprojek betrokke is, want die nood is werklik enorm. Ons is ook dankbaar vir die 30 persone wat weekliks help sop kook. Volgens Anéne Nortier, wat met die koördinerings van die sopkokers behulpsaam is, voorsien baie van dié mense die sopbestanddele uit hulle eie sakke. Nog helpers sal baie welkom wees, sodat sopkokers soms 'n ruskans gegun kan word. [Lees meer...](#)



Boere van die Koue Bokkeveld-distrik het vrugte en groente ten bate van die gemeente se kosprojek geskenk.



Foto links: Dries Potgieter kook daagliks sop om te verseker dat daar genoeg voorraad is. Die sop word in

roomysbakke en ander houers gevries en dan aan gesinne versprei. Hy sê dat hy spesiaal die ekstragroot houtlepel aangeskaf het, sodat hy die groot potte soos gemaklik kan roer. Foto regs: Anéne is besig om vir gesinne in Ysterplaat bakkies met sop te vul. "Dis lekker dik sop," sê sy, "so die mense sal dit kan verdun om dit meer te maak."



Foto links: Die 430 kg hoenderborsies wat as skenking ontvang is, is onder gesinne in Ysterplaat versprei. Foto regs: Ons span getroue kospakkers is besig om pakkies niebederfbare kos te verpak.



Foto's links en middel: Tydens ds. Why Duvenhage se besoek aan die Kannaland kon hy ook van die serpe en musse wat deur die breigroep gebrei is, uitdeel. Ons is baie dankbaar teenoor die lede van die breigroep wat deur die loop van die jaar so hard gewerk het. Op die foto heel regs help Isabel Steenkamp met die uitdeel van sop.

So lyk die geldsake . . .



Deur: Ds. Callie Visagie

Die kwessie van die feesmark

Die feesmark was die afgelope 26 jaar 'n belangrike gebeurtenis en hoogtepunt op die gemeentelike kalender. Dit het nie net as saamweesgeleentheid gedien en ons gemeente se beeld na buite vertoon nie, maar was ook 'n belangrike bron van inkomste vir die gemeente. Dié inkomstebron (R2,25m van totale begrote inkomste van R10 miljoen = 22,5%) het dit die afgelope jare vir die gemeente moontlik gemaak om 'n derde van ons inkomste aan verskeie projekte toe te wys. Ons het deurgaans besef dat ons nie te afhanklik van hierdie inkomstebron moet raak nie – en nou is dit 'n werklikheid.

Die kerkraad het in oorleg met die fondsebediening 'n aangepaste begroting vir die boekjaar

aanvaar. Die personeel se vergoeding is met 20% verminder en ons aansoek by die TERS- en werkloosheidsverseringsfonds het dit moontlik gemaak dat ons eenmalig 90% van ons personeel se vergoeding kon uitbetaal. Alle ander uitgawes is ook drasties gesny. [Lees meer...](#)



Bybelskool | Op reis saam met Paulus

Die grootste deel van die Nuwe Testament bestaan uit briewe wat deur Paulus aan die vroeë gemeentes geskryf is. Dit is dikwels vir ons moeilik om elkeen van Paulus se briewe afsonderlik te beoordeel en die belangrike nuanses en verwickelinge wat in die skrifgedeeltes opgesluit lê, te begryp. In die volgende aanlyn Bybelskool gaan ons juis dit doen. Ons gaan in Paulus se voetspore loop en ontdek hoe nuwe moontlikhede vir gelowiges onder leiding van God se Gees in hulle eie leefwêreld gerealiseer het. Ds. Marius Breytenbach bied die kursus aan en dit sal teen die einde van Junie aanlyn op www.stellenberg.co.za beskikbaar wees, klik net op die Bybelskool-blokkie op die tuisblad, of volg die [skakel](#).

Share this email:



[Manage](#) your preferences | [Opt out](#) using TrueRemove™

Got this as a forward? [Sign up](#) to receive our future emails.

View this email [online](#).

h.v. Edelweissweg en Mountain Viewrylaan
Eversdal, Wes-Kaap | 7550 ZA

This email was sent to .

To continue receiving our emails, add us to your address book.

[Subscribe](#) to our email list.